

Unser Flerschem werdd lewe

In de letzde Daache iss dorch enn Leserbrief erauskumme, dass enn Mitarweider von de Fraport e saublöd Bemerkung gemacht hott weiler endeckt hawwe will, dass de Dümmsde von de gonz Geechend um Fronkfort erum enn Mensch aus Flerschem iss. Ich hatt dess noch nit richdisch gelese doo habb ich schunn su enn Zorn kriecht, dass ich mich gleich onn moin Kompjuder gesetzt habb unn mettem eichene Leserbrief im Flerschemer Blättche dem Kerl sozesaache uffs Maul haache wollt.

Awwer dann habb ich merrs iwwerleecht, habb aach e paar Freunde oogerufe unn habb doodruffhie moin Brief in de Babierkorb geschmisse. Weil ich unn moi Freunde sinn uns oonisch worrn, dass so e schlecht Gebabbel von emm kloone großmäulische Oogestellte ess oofach nit wert iss, dorchs Hie- unn Herschreiwie noch greeßer gemacht ze werrn. Omm End bleibt von der gonz Sach doch nor hänge, dass wirklich bloß die dümmsde Leit noch nooch Flerschem ziehe unn dass die Owwerdümmsde die sinn, die hier schunn long wohne unn oofoch nit fortzieh wolle.

Trotzdem, so habb ich gedenkt, derf merr so enn Dummschwätzer von de Fraport nit babbele losse unn deshalb habb ich mich gefreut, dass unsern Beiemooster gleich onn de Chef vom Fluchhaafe, de Wilhelm Bender, geschriwwe unn den um Antwort gebete hott. Ich kann merr iwwerichens vorstelle, dass dem Bender dess Gelaaber von soim Oogestellte aach nit gefalle kann. Der waaß nemlich gonz genau, wie mir allminonner – die Stadt, die Partie, de Verein ferr Flerschem unn unser Oowält aus Münche – uns in de letzde John geeche den Krach in de Luft unn geeche die nei Londebohn gonz hefdisch unn nit ohne Erfolg gewehrt hawwe, dass mir also alles onnere als dumm odder bleed sinn. Denn hätte merr uns nit gewehrt, wär die Londebohn schunn zur Weltmeisterschaft 2006 gebaut gewese. Obse 2010 gebaut iss, dess wolle merr erst emol sehe, mir kämpfe weider!

Dess war dess ersde was ich saache wollt: Mir sinn nit so dumm, uns alles gefalle ze losse unn dess wisse die bei de Fraport. Unn zweitens sinn mir nit so dumm um nit ze wisse, dass in Flerschem weiter wie bisher unn aach in Zukunft e gonz Meng gemacht werrn muss, um unser goldisch Städtche nit nor ferr die Leit die hier wohne, naa, aach ferr die Leit in de Umgeechend ooziehend ze halle. Doo werdd joo schunn seit John vill gemacht unn soll noch mehr gemacht werrn, unn wer eiern Honnes kennt der waaß, dass ich bei dere Sach debei bin, deetzt erst mett moim Oisatz ferrs FAT weech dem Schitzhof odder, wanner wirklich abgerisse werrn muss, weechem Ersatzbau mettem kloone, awwer schnuckeliche Theaterraum. Unn ich waaß gonz genau, dass alle alde unn neie Flerschemer unn die Leit uff de Stadt unn die in de Flerschemer Partie dess gonz genau so sehe: Unser Flerschem muss unn werdd lewe!

Ich will nit saache dass ich immer Recht habb awwer ich moon, ess wär besser onn de Zukunft von Flerschem mitzeschaffe – egal wie unsern Ort vom Fluchhaafe gebeutelt werdd - als sich dorchs noch so gut gemoonte Gekrisch iwwer so enn kloone Fraport-Honsworscht sich onn de Demondasch von unsern Flecke ze beteilische.

Eiern Honnes